



Novitads dalla suprastonza communal

Traffic public d'unviern gratuit entuorn il Mundaun

La suprastonza communal ha decidiu da far ina cunvegna cun igl AutoDaPosta per che indigens e hosps sappien nezegiar gratuitamein igl auto da posta duront la sesiun d'unviern 2017/18. La purschida vala naven dils 10-12-2017 entochen ils 02-04-2018 sin las lingias Glion - Sursaissa Friggahüs, Glion - Vrin sco era sin las ulteriuras lingias egl entir territori dalla vischernaunca Lumnezia. Indigens e possessurs da secundas habitaziuns el vischinadi da Suraua ston s'annunziar tier la canzlia communal Lumnezia per survegnir in abonnement gratuit. Quei per segirar ch'igl abonnement gratuit vegni duvraus mo sil territori dalla vischernaunca Lumnezia. Tut ils auters san far diever digl auto da posta gratuit senza mussar in bigliet ni ina carta.

Contracts per trapass ella zona d'enneiver Lumnezia

Ils sbozs dils contracts denter las Pendicularas Péz Mundaun ed ils proprietaris da terren ch'ein pertuccai da trapass en connex cun las lingias per far neiv el territori da skis Lumnezia ein preparai per suttascriver.

Reglement da fatschenta e delegaziun da cumpetenzas

La suprastonza communal ha mess en vigur il reglement da fatschenta ed il reglement da delegaziun da cumpetenzas per la vischernaunca Lumnezia. Ils reglements cun las annexas leutier ein publicai sut www.lumnezia.ch.

Leschas communalas

Tenor il contract da fusiun ha la vischernaunca fusiunada d'unificar sia legislaziun enteifer 5 onns. Tier la gronda part dallas leschas ei quei gia succedi. Sco proxim vegn la lescha da meglieraziun suttamessa alla radunanza communal ed all'urna per approbaziun. La lescha entra en vigur ensemble cun in'ordinaziun per il diever da vias communalas che vegn relaschada entras la suprastonza communal. Plinavon sesanfla la lescha da baghegiar en elaboraziun. La cumissiun da planisaziun prepara in sboz per ina lescha unificada formalmein. Era vegn ina lescha davart igl uorden public preparada sin la fin digl onn.

Signalisaziun dalla via cantunala a Glion per la Lumnezia

Las tablas da signalisaziun ed ils muossavias dalla vischernaunca fusiunada Lumnezia duein vegnir adattai. Il departament cantunal ed igl uffeci federal dallas vias fan la pretensiun d'indicar il num dalla vischernaunca politica ensemble cun il num d'in liug. La suprastonza communal ei sedecidida per la signalisaziun Lumnezia – Vrin. Aschia ei il num dalla vischernaunca integraus ella noziun ensemble cul num dil vischinadi il pli entadem la val.

Annunzia projects vias da meglieraziun per 2018

Per il program da baghegiar 2018 ei vegnii annunziau agl uffeci d'agricultura dil cantun Grischun las vias nr. 2 (Curtgin Grond – Foppa) e 3 (Crusch – Val Baniera) a Surcasti. Sco opzioni supplementara ei la via nr. 5 (Arliun – Schumials) a Surcasti vegnida indicada.

Stan da sittar da catscha Bual a Vella

La suprastonza communal ha decidiu da sustener la sanaziun dils pegliaballas dil stan da tir da catscha Bual a Vella che vegn realisada entras la Secziun Péz Ault. El medem mument intenziunescha la vischernaunca da sanar il terren contaminau en quei liug.

Tualetta publica a Lumbrein

La suprastonza communal ha incaricau Ramun Capaul d'elaborar variantas per ereger ina tualetta publica a Lumbrein.

Surbaghegiada Palius

Enteifer la surbaghegiada Palius eis ei previu da construir mintgamai ina habitaziun el baghetg principal ed el baghetg secundar. Cunquei ch'igl interess per prender a tscheins las habitaziuns ei buca semussaus entochen ussa, vegn il spazi da habitar baghegiaus ad interim mo tochen tier la construcziun criua. Il medem vala per il spazi da terapia el baghetg principal. Las localitads da stizun e pratica da miedi veggan terminadas sin l'entschatta december 2017.

Habitaziuns ella surbaghegiada Naus a Morissen

Ella casa Naus a Morissen ein duas habitaziuns vitas stadas publicadas duront plirs meins senza che indigens han mussau interess d'affittar quellas. La suprastanza communal ha perquei decidiu da metter a disposizion las habitaziuns per diever da vacanzas.

Dislocaziun dalla biblioteca Lumnezia

La suprastanza communal ha priu ina decisiun da principi da dislocar la biblioteca Lumnezia che sesanfla el baghetg dall'aula dalla casa da scola Sutvitg a Vella ellas localitads che veggan duvradas da present per la stizun dil Volg a Vella.

Elecziun da persunal

Cunquei ch'igl ei buca reüssiu d'occupar igl entir pensum dallas pazzas vacantas tier l'administraziun communal Lumnezia ha la suprastanza decidiu da surdar in mandat per lavurs digl actuariat e lavurs da correspondenza alla fundaziun inplus, Glion. L'incumbensa cumpeglia in pensum da 50% e vegn exequius naven digl 1. da schaner 2018 entras Silvana Caviezel.

Sustegns finanzials

La suprastanza communal ha decidiu da sustener ils suandonts projects cun ina contribuziun finanziala:

- Uniun da teater Cuschnaus pil project da teater „Rir da schluppar“ che vegn presentaus il 2018;
- project da concerts cun ovras da Gion Giusep Derungs;
- ediziun d'in cudischet cun limericks dad Erwin Caduff.